

**REGIONAL NEWS UNIT  
ALL INDIA RADIO, AGARTALA**

**Date: 22-08-2017**

**Time: 07:35-07:40 AM Hrs**

**BENGALI MORNING BULLETIN**

---

**শিক্ষক প্রশিক্ষণ / রতনলাল নাথ :**

শিক্ষকদের গুণগত প্রশিক্ষণ দেয়া নিয়ে রাজ্য সরকারের ভূমিকায় ক্ষোভ ব্যক্ত করেছেন বিধায়ক রতন লাল নাথ। গতকাল এক সাংবাদিক সম্মেলনে তিনি বলেন, সারা দেশের সাথে রাজ্যের শিক্ষকদের গুণগত প্রশিক্ষণ দেওয়ার জন্য বলেছে কেন্দ্রীয় সরকার। এই ব্যাপারে রাজ্যের জন্য একজন নোডাল অফিসারও নিয়োগ করা হয়েছে। কিন্তু রাজ্য সরকার নির্দিষ্ট সময়ের মধ্যে এই ব্যাপারে যথাযথ উদ্যোগ নেয়নি বলে তিনি অভিযোগ করেন। অবিলম্বে এই ব্যাপারে প্রয়োজনীয় ব্যবস্থা গ্রহণের জন্য তিনি দাবী জানিয়েছেন। এব্যাপারে এক প্রশ্নোত্তরে শিক্ষামন্ত্রী তপন চক্রবর্তী জানান, বিষয়টি সম্পূর্ণভাবে প্রাথমিক শিক্ষকদের প্রশিক্ষণের ব্যাপার। সংশ্লিষ্ট সবাইকে শিক্ষক শিক্ষণ প্রশিক্ষণ দিতে রাজ্য সরকার পদক্ষেপ নিয়েছে।

এদিকে, বিদ্যালয় শিক্ষা দপ্তর থেকে এক বিজ্ঞপ্তিতে বলা হয়েছে যে, শিক্ষা অধিকার আইনের নতুন সংশোধনী অনুযায়ী সারা দেশে প্রাথমিক শিক্ষক স্তরে শিক্ষক শিক্ষণ প্রশিক্ষণ নেওয়া বাধ্যতামূলক এবং ২০১৯ এর পয়লা এপ্রিলের মধ্যে এই প্রশিক্ষণ না নিলে শিক্ষক হিসেবে নিযুক্তি বাতিল হয়ে যাবে। একারণে, রাজ্য সরকারগুলিকে সব রকমের পদক্ষেপ নিতে বলেছে কেন্দ্রীয় মানব সম্পদ উন্নয়ন মন্ত্রক। কেন্দ্রীয় মন্ত্রক এজন্য ন্যাশনাল ইন্সটিটিউট অব ওপেন স্কুলিং-এর মাধ্যমে একটি অনলাইন প্রশিক্ষণের ব্যবস্থা করেছে। শিক্ষা দপ্তরের বিজ্ঞপ্তিতে আরো বলা হয়েছে, এজন্য রাজ্যে শিক্ষা দপ্তর ড. পীযুষ প্রসাদকে নোডাল অফিসার হিসেবে নিযুক্ত করেছে।

\*\*\*\*\*

## **ব্যাক্স ধর্মঘট :**

ইউনাইটেড ফোরাম অফ ব্যাক্স ইউনিয়নের ডাকে আজ রাজ্যেও ব্যাক্স ধর্মঘট। ইউনিয়নের ত্রিপুরা রাজ্য কমিটির আহবায়ক নিখিল দাস জানিয়েছেন, ব্যাক্স একীকরণ, বিলম্বীকরণের প্রতিবাদে এবং ১৭ দফা দাবিতে দেশব্যাপী একদিনের ব্যাক্স ধর্মঘটের ডাক দেওয়া হয়েছে। ধর্মঘটের দিন ব্যাক্স কর্মীরা বিক্ষোভ দেখাবেন বলে তিনি জানান।

\*\*\*\*\*

## পুলিশ :

আগরতলার বটতলার কাছে গাঙ্গাইল রোড এলাকায় শংকর চক্রবর্তী নামে ছুরিকাঘাতে আহত এক যুবককে পুলিশ উদ্ধার করে। রাতে তাকে জিবি হাসপাতালে ভর্তি করা হয়। পুলিশ জানিয়েছে, নেশাগ্রস্ত এই যুবকের বাড়ি বাধারঘাট এলাকায়। দোষীদের গ্রেফতারে পুলিশ ঘটনার তদন্ত শুরু করেছে।

\*\*\*\*\*

## ইগনৌ :

ইন্দিরা গান্ধী মুক্ত বিশ্ববিদ্যালয়, ইগনৌ ২০১৭-র জুলাই সেশনে স্নাতক, স্নাতকোত্তর ডিগ্রি, স্নাতকোত্তর ডিপ্লোমা এবং ডিপ্লোমা প্রোগ্রামের বিভিন্ন পাঠক্রমে ভর্তির জন্য শেষ তারিখ ২০১৭-র ২৮ আগস্ট পর্যন্ত বৃদ্ধি করেছে। ইগনৌ-র ওয়েবসাইট [www.ignou.ac.in](http://www.ignou.ac.in)-এ অনলাইনে আবেদন করা যাবে। বিস্তারিত জানার জন্য আবেদনকারীরা রিজিওন্যাল সেন্টার বা স্টাডি সেন্টার-এ যোগাযোগ করতে পারেন। ইগনৌ-র আগরতলা কেন্দ্রের আঞ্চলিক অধিকর্তা এখবর জানিয়েছেন।

\*\*\*\*\*

## ভাদ্র মেলা :

কমলাসাগরের কসবা কালীবাড়িতে আয়োজিত দু'দিনের ভাদ্র মেলা গতকাল রাতে শেষ হয়েছে। গতকাল অমাবস্যা তিথি থাকায় সন্ধ্যার পর বহু পুন্যার্থী কালীবাড়িতে পূজা দেন। দর্শনার্থীদের ভিড় লক্ষ্য করা গেছে। তথ্য-সংস্কৃতি দফতরের উদ্যোগে আয়োজিত সাংস্কৃতিক অনুষ্ঠানও উপভোগ করেন অনেকে। উল্লেখ্য, গত রবিবার থেকে শুরু হয়েছিল ভাদ্র মেলা।

\*\*\*\*\*

## তথ্য আধিকারিক :

নীতি আয়োগের উদ্যোগে আয়োজিত এক বৈঠকে আজ প্রধানমন্ত্রী নরেন্দ্র মোদী যুব কার্যনির্বাহী আধিকারিকদের সঙ্গে মিলিত হবেন। যুব ব্যবসায়িক নেতৃবৃন্দের সঙ্গে দেশের মূল সমস্যাগুলির সমাধান সূত্র নিয়ে বৈঠকে আলোচনা হবে। বর্তমানে দেশে সরকারী ও বেসরকারী ক্ষেত্রের পারস্পরিক সম্পর্ক নিয়েও পর্যালোচনা হবে। ২০০-রও বেশি কার্যনির্বাহী আধিকারিক এই মত বিনিময় বৈঠকে উপস্থিত থাকবেন। প্রধানমন্ত্রী-সহ মন্ত্রিসভার অন্য সদস্যরাও এই বৈঠকে ডিজিটাল ইন্ডিয়া, স্বাস্থ্য এবং পুষ্টি, শিক্ষা এবং দক্ষতা উন্নয়ন-সহ বিভিন্ন

বিষয়ে মত বিনিময় করবেন। এটি হলো এই ধরনের  
দ্বিতীয় বৈঠক।

\*\*\*\*\*

### কংগ্রেস বিচার বিভাগ :

প্রদেশ কংগ্রেস বিচার বিভাগ কমিটির প্রথম বৈঠক  
রবিবার অনুষ্ঠিত হয়। এই কমিটির চেয়ারম্যান,  
আইনজীবী অমৃত লাল সাহার সভাপতিত্বে অনুষ্ঠিত  
বৈঠকে ঠিক হয়, জনগনের অভাব-অভিযোগ, বৈষম্য ও  
অবিচারের ঘটনায় আইনী সহায়তা দিতে এই কমিটি  
কাজ করবে। কমিটির এদিনের বৈঠকে, চেয়ারম্যান শ্রী  
সাহা সহ ভবানন্দ ভৌমিক, স্বপন কুমার দাস, সুজয়  
সরকার, শ্রীমতি হেনা সেনগুপ্ত, রামু দাস বক্তব্য  
রাখেন।

\*\*\*\*\*

### সেলাই মেশিন প্রদান :

তেলিয়ামুড়া মহকুমা প্রশাসনের উদ্যোগে এবং ত্রিপুরা  
ওয়াকফ বোর্ড-এর আর্থিক সহায়তায় সংখ্যালঘু ২০ জন  
বেকার যুবক-যুবতীকে সেলাই মেশিন প্রদান করা  
হয়েছে। তেলিয়ামুড়া মহকুমা প্রশাসন কার্যালয়ে গতকাল  
এক অনুষ্ঠানের মাধ্যমে এই সেলাই মেশিনগুলি তুলে

দেওয়া হয়। অনুষ্ঠানের উদ্বোধন করেন বিধায়ক গৌরী দাস। উপস্থিত ছিলেন তেলিয়ামুড়া পুর পরিষদের চেয়ারপার্সন সজল কুমার দে, তেলিয়ামুড়া পঞ্চায়েত সমিতির চেয়ারম্যান অমরেশ চৌধুরি, ত্রিপুরা ওয়াকফ বোর্ড-এর কার্যনির্বাহী আধিকারিক মোসলেম উদ্দিন আহমেদ প্রমুখ।

\*\*\*\*\*

### **এথলেটিক্স :**

রাজ্যভিত্তিক এথলেটিক্স প্রতিযোগিতার তিনদিনের আসরের দ্বিতীয় দিনে গতকাল ৩০টি বিভিন্ন ক্যাটাগরিতে স্বর্ণ পদকের ফয়সালা হয়। বাধারঘাটের দশরথ দেব স্টেডিয়ামে তিনদিনের এই আসর আজ শেষ হচ্ছে। আসরে ৮টি জেলা দল ও তিনটি ইউনিটের খেলোয়াড়রা অংশ নিয়েছে।

\*\*\*\*\*

### **আবহাওয়া :**

আবহাওয়ার পূর্বাভাসে জানানো হয়েছে, আকাশ আংশিক থেকে প্রধানত মেঘলা থাকবে। বজ্রবিদ্যুৎ-সহ বিক্ষিপ্তভাবে বৃষ্টি হতে পারে। গতকাল রাতেও আগরতলা-সহ আশেপাশের এলাকায় এক পশলা বৃষ্টি

হয়। বৃষ্টিপাতের পরিমাণ ছিল ২০.৮ মিলিমিটার। আজ সকালে সর্বনিম্ন তাপমাত্রা ছিলো ২৪.২ ডিগ্রী সেলসিয়াস। বাতাসে জলীয় বাষ্পের পরিমাণ বেশি রয়েছে।

\*\*\*\*\*